

pagnia, et el consolo sier Andrea Arimondo et merchadanti deliberò andarsene a visitarlo; cussì andò, et io con loro. Et essendo andati a la presentia sua, fossemo da esso Soldan tanto ben rezeputi, che non si potria esser più. Comenzando lui prima a parlar in rabescho con il nostro sier Zorzi turziman, dicendo « Siate li ben venuti, che volevu? xe alcuno che vi dagi fastidio? xe alcuno che vi faza inzuria? parlè, non fazete ». El consolo, con el suo consueto, con audazia et con modo response che feze stupir tutti li zircostanti, dicendo che el ringratiava el Signor Dio de tanto beneficio et tanta gratia che li havea data, che nel suo consolato veniva in quel paexe un tanto Signor, con tante altre ornate parole ben dite, *adeo* ch'è con contento del Soldan, el qual comenzò a dir: « Consolo! come stà el mazor vostro de Venezia? Come state voi? » Li rispose el consolo: « Tutti ben, pronti a' suoi comandi ». Li replicò *etiam*: « Consolo, varda se alcuno vi ha fato et vi farà dispiazer, parla, dimelo, che castigarò li malfatori », dicendo « son venuto a edificar il paese e non ruinarlo ». Li rispose el consolo: « Signor Soldan! ozi son venuto a umiliarme e basar la terra davanti la tua Maestà, et quello che a la tua signoria voria dir saria molto longo, che per non tenirti a tedio mi riporto con più comodità e tempo », et con molte altre parole, tolse licentia e tornasemo. E da poi visitato suo fiol e altri, tornasemo a caxa; et questo fo uno Mercore. El zorno seguente, che fo Zuoba, el feze l'intrata il signor Soldan, over el pasò, e non volse intrar in la terra, ma per Ehubaisath e da Tresade via andò e passò per Bazarò dil Soldan, fazendo la strada de Samaria. Se ne andò a butar al Chabon con tutto el suo campo, che fo bellissimo veder uno tal potentato; qual non vene armadi, ma desarmadi. Haveva 366 80 gambeli coradori 3 quarti coperti de lavori d'oro tronchafila, el resto restagni; poi tante altre coperte de seda; haveva 700 cavali in destra, la più bela cosa che mai vedesi, parte nudi, parte coperti di raxi et ormezini zallo, et la più parte de arme desco- perte in ogni bellezza; l'haveva una infinità di cariazzi: se judicha l'habia con lui tutto el suo thesoro. Hor pasando per mezo la caxa de Moidin da li ormesini, a mezo la strada de Chubaibath, el consolo con tutti li franchi andò in quel locho a veder; et come el fo per passar, feze impizar 24 torzi grossi de quelli de chiesa nuovi e vechii, et feze distender per terra peze do raxi bianchi, erano braze 123, che fo tra mori una bella pompa, nè mai cavallo nè altri sapò suso, ma tutti feva chale. Hor zonto el Soldan, vedando quello haveva fatto franchi, volse mostrarli

di non ne voler far danno, et non volse zapar suso; ma comandò fosse levado in quel di li; questo subito fo zafado et butato in cento pezi. Et venendo el Soldan de longo, el consolo li corse incontro, et haveva 25 veniziani in pugno et ge li butò fino sul viso; el Soldan parse se meravegliasse, et fermossi con el cavalo, eridando: « Consolo! non far ». Et el consolo aveva indosso in manega ducati 100 de Mozenigi de zecha e andava drio butando, et el Soldan più eridava « basta, basta » et el consolo andò drio sino ne avanzò pur uno, con tanta gratia, che mori eridava « Dio te mantegna, consolo ». Hor penseve la turba che era a coglier tal danari, che el Soldan quasi non poteva passar, e disordinò tutti li schiavi. Hor passono d'oltra e andò al suo locho; questo fo el Zuoba. Da poi el Venere, el consolo nostro volse andar al suo locho, perchè ognun pensava volesse vegnir a saludar in moschea; qual non vene, dicendo non esser bon il tornar indrio quando se ha da far una impresa. Sabato seguente, el consolo andò a portar el presente, e lo portò con tanto ordine che ogniun coreva a veder: era tabolie 25, zoè su do tabolie ducati 1000 per tabolia di maidini, et da poi 7 tabolie fra panni scarlati, paonazi, damaschini, veludi alti e bassi e piani, armelini e conii, et 4 tabolie 367 con 4 castelli de zucharo et una de frutti de zucharo, et uno seachier, et cavalli, et homeni, et tre tabolie de siropi in pignate, et el resto marzapani, pignochade, fongi e altro; qual tutte robe fo condute davanti la sua presentia, tutte portade per franchi, chè el consolo non volse, quando el fo per portarle davanti, che le portasse altri che franchi, et li comenzò a farli oration bellissima, pregando che el voja acetar quel pocho de presente volentiera, non secondo che se conveneria a uno tanto Signor, ma secondo el pizol poder de' franchi, qual a quel tempo non molto poteva far, prima per non esser le fazende e vadagni zà era, e poi che ancor nave non era zonte; con altre belle parole ornate, che la suficientia di sier Zorzi turziman, fonte di eloquentia, portò. El signor Soldan parse che el fenese non volerlo azetar, dicendo « Consolo, ogni cosa vedo et cognosco, et non feva mestier che ti me presentasi, ma bisognava che io te presentasse a ti; cognoso el cor vostro », con molte parole, dicendo « So se fa poche fazende, pur consolo, el mio paexe se exorta li tui merchadanti; ti vedi Damasco, xe tuo Alepo, xe tuo Aman, xe tuo Tripoli e Baruti, xe toi e de tutti vuy, altri che vuy non lo maniza, sono el paexe vostro: fati di quello quel vi piazze. E feze venir di longo el presente. Prima era li danari 1000 ducati per tabolia